

11 JUN 2002

Suffian-Yayasan/I (Bergambar)

YAYASAN TUN SUFFIAN DITUBUH UNTUK ABADIKAN NAMA BELIAU

KUALA LUMPUR, 11 Jun (Bernama) -- Yayasan Tun Suffian ditubuhkan hari ini untuk mengabadikan nama baik bekas Ketua Hakim Mahkamah Persekutuan Tun Mohamed Suffian Mohamad Hashim.

Pengasas Yayasan, Tunku Datuk Dr Sofiah Jewa berkata, ia merupakan sebuah yayasan kebajikan yang ditubuhkan selari dengan falsafah dan harapan allahyarham dalam menegakkan ketulusan bidang kehakiman dan profesion perundangan.

Beliau berkata, Yayasan itu akan ditadbirkan oleh 11 orang anggota Lembaga Amanah yang dipengerusikan oleh Ketua Hakim Negara Tun Mohamed Dzaidin Abdullah.

Yang turut menganggotai lembaga itu ialah Menteri di Jabatan Perdana Menteri, Datuk Seri Dr Rais Yatim dan adik Suffian yang juga seorang jurutera, Tan Sri Talha Mohamad Hashim.

Bagaimanapun, Rais tidak dapat hadir pada acara menandatangani surat ikatan amanah dan satu perjanjian tambahan kepada surat ikatan itu yang berlangsung di kamar Ketua Hakim pagi ini, antara Tunku Sofiah, yang juga rakan karib allahyarham dan lain-lain anggota lembaga.

Allahyarham Tun Suffian meninggal dunia ketika berusia 83 tahun di rumah rakan karib beliau di Petaling Jaya pada 26 Sept 2000.

Acara tandatangan itu turut disaksikan oleh Hakim Ad Litem Tribunal Jenayah Antarabangsa bagi bekas negara Yugoslavia, Tan Sri Dr L.C.Vohrah.

Lain-lain anggota lembaga amanah itu ialah bekas Hakim Mahkamah Rayuan, Datuk Shaik Daud Md Ismail, Hakim Mahkamah Rayuan, Datuk K.C.Vohrah dan Naib Canselor Universiti Malaya, Prof Datuk Dr Anuar Zaini Md Zain, peguam Datuk Dr Yaacob Hussain Merican dan Zaid Ibrahim, pengamal perubatan Dr Liew Yin Mei, akauntan berkanun Datuk Ahmad Johan Mohamad Raslan dan pengarah urusan Malayan Law Journal Michael John Evans.

Menurut satu kenyataan yang dikeluarkan kepada Bernama, para pemegang amanah akan memohon kepada Perdana Menteri Datuk Seri Dr Mahathir Mohamad untuk memperolehi sijil pendaftaran sebagai pemegang amanah Yayasan, sebagai sebuah badan korporat, merujuk seksyen 4 Akta Pemegang Amanah (Perbadanan) 1952.

Apabila sijil diperolehi, Yayasan akan dikenali sebagai "Yayasan Tun Suffian Berdaftar".

-- BERNAMA

SBB ZS HM